

## [106] CHAPITRE VII.

DE LA RESIDENCE DE LA CONCEPTION, AUX TROIS  
RIUIERES.

**I**E croy que la pauvre Eglise des Trois Riuieres, a esté plus battuë cette année de toutes fortes de vents, que les pilotes ou nautonniers n'en marquent dedans leurs rofes, ou dedans leurs cartes marines: Il s'est fait là de temps en temps, vn ramas de diuerfes Nations, qui a bien donné de l'exercice à nos Peres: On y a veu des Sauuages de l'Isle de la petite nation des Attikamegues, des Montagnais, des Skotoemis, des Snatcharonons, & plusieurs autres, dans la paix, dans la guerre, dans de petites jalousies les vns enuers les autres; si bien que les mauvais gastoient les bons, & les Demons réueilloient les superstitions, qu'on ne voit plus à Sainct Ioseph, & qui sembloient estre éteintes aux Trois Riuieres: Mais écoutons ce qu'en escriuent le Pere Iacques Buteux & [107] le Pere Iean de Quen, dedans les lettres qu'ils ont enuoïées à nostre R. Pere Superieur, & dedans les memoires qu'ils m'ont communiqués: Les Chrestiens de Sainct Ioseph qui font montés icy, font tres-bien, le moins qu'il en pourra venir pour le present, ce fera le meilleur pour eux: car les Sauuages venus nouvellement des terres de diuerfes contrées, n'ayant encor eu aucune instruction, resuscitent les vieilles superstitions; ils font bruire les tambours, dont il n'estoit quasi plus de memoire, ils réueillent